

DOCUMENTO POLÍTICO DE EN MAREA

Plenario, 17 de decembro de 2016

1. Reforzar En Marea como suxeito político.

En Marea é un espazo de encontro para un suxeito político de ruptura en construción no que participan, e deben participar, organizacións políticas, agrupamentos sociais, colectivos que operan na sociedade civil, cidadanía do común non organizada politicamente, Mareas municipais, etc.

Os documentos base para a creación deste espazo son os xurdidos dos acordos da Marea Constituínte de Vigo, do 30 de xullo de 2016.

En Marea vai sendo o resultado dun proceso de unidade popular e confluencia, de acumulación de formas diversas, en que a cidadanía do común toma a iniciativa e as organizacións contribúen, como motores auxiliares, a darlle continuidade e consistencia. Pero as organizacións como tales xa non son En Marea; o seu labor consiste en ofrecer as súas experiencias militantes para a construción do suxeito novo.

Organizativamente, En Marea é o encontro entre o mundo que provén da participación política e o que se constrúe desde o 15M e outros procesos de encontro popular e asembleario, pasando polas mareas municipais e outras iniciativas globais ou sectoriais.

En Marea é un suxeito popular, democrático, radical, republicano e de ruptura.

2. Erosionar o dominio conservador e crear condicións para o cambio político.

O relato que conduce a En Marea é un relato de impugnacións. No plano político, arrinca en outubro de 2012, continúa nos procesos populares que dan lugar ás alcaldías rebeldes e ás mareas municipais en 2015 e chega ata nós. Mais no plano social é moito máis complexo e vén de moito antes: desde o Nunca Máis, pasando por todas as mobilizacións sociais, políticas e de defensa dos dereitos colectivos e de sectores vitais, o 15M, etc. De principio a fin, paso tras paso, é un movemento que se xesta na impugnación. Impugnación da base material sobre a que se edifica o sistema; impugnación do sentido común do réxime e do sistema; impugnación da representación política entendida como unha entrega sen condicións da capacidade política e de decisión da maioría social.

En Marea é pois un instrumento de impugnación do existente e, como tal, de proxección dun tempo novo.

Ese historial de impugnación sistemática condúcenos a entender En Marea en clave de

instrumento para a creba democrática mediante procesos de acumulación de forzas, de unidade popular, de converxencia, de autoorganización e democracia radical, de movemento político e social que traspasa os límites das institucións do réxime, que proxecta converter a sociedade civil en escenario de emancipación e de construción dunha república de homes e mulleres libres e iguais.

En Marea é, por todo iso, un suxeito que non se somete de ningunha maneira á normalización política nin á homologación coas forzas do réxime.

3. Construír En Marea como alternativa de goberno na oposición, sostendo a axenda institucional coa axenda da cidadanía.

O proceso de construción do suxeito de ruptura ten moito de experimentación creativa: seguimos intentando organizar un movemento social e político que non acabe recluído en vellas concepcións do instrumento partido. Esa experimentación creativa esixe que todas as posibilidades estean en gran medida abertas.

En Marea, ademais de buscar a maior das eficacias posibles como instrumento político, debe comprometerse a funcionar como un reflexo da sociedade a que aspiramos. Nese sentido, a democracia radical, a participación en pé de igualdade, a liberdade de discrepancia, a cooperación, a diversidade, etc., son elementos identificativos.

Compre revertir os mecanismos de confección das alternativas programáticas e a relación xerarquizada entre as organizacións políticas e as sociais inherentes a aquelas, construíndo un programa en base ao diálogo e ao traslado as institucións daquelas demandas xeradas precisamente entre os movementos sociais que, como Pobo organizado, establecen as propostas sectoriais e territoriais que son quen de armar unha alternativa popular e con arraigo.

Compre establecer do mesmo xeito os mecanismos de coordinación acaídos que compaxinen a actividade nas institucións coa presenza nas rúas e a complementariedade necesaria entre as accións institucional e social.

4. O Programa de En Marea

En Marea, como espazo de encontro e de organización para a ruptura democrática e a transformación social, é unha ferramenta de intervención política cuxos principios programáticos aluden á necesidade de:

- resistir os ataques terminais do capital contra o traballo que se expresan na destrución das conquistas sociais, laborais e democráticas das clases subalternas
- intervir nas institucións para legislar a favor do mantemento e da ampliación constante de dereitos e conquistas da cidadanía do común. Os dereitos básicos (vivenda, enerxía, unha vida digna, ensino, sanidade, cultura, etc.) como guía de acción inmediata.
- intervir na sociedade civil para crear redes de solidariedade e de contrapoder e institucións populares alternativas

- defender en todos os ámbitos o ben común e a propiedade e os intereses do común fronte aos intereses privados e de lucro dunha minoría
- defender unha democracia absoluta, radical, que abra as canles necesarias para que a cidadanía do común decida sobre a totalidade das cousas que nos afectan
- unha democracia política e económica sen restriccións
- unha visión republicana: Liberdade, Igualdade e Fraternidade como programa oposto ao da oligarquía
- defender o dereito a decidir, a decidilo todo, como un dereito fundamental. E decidilo todo implica tanto a toma de decisións respecto ás políticas que afectan directa e indirectamente á vida das persoas coma o propio Dereito de Autodeterminación como pobo

Destes grandes eixos desprenderanse as bases de actuación no desenvolvemento de En Marea, que serán as seguintes:

- A. Ampliar a democracia desde a sociedade civil e empoderar aos axentes sociais transformadores.
- B. Consolidar o goberno dos concellos rebeldes e promover unha nova vaga de mareas municipalistas.
- C. Desbloquear o autogoberno e recuperar as institucións para poder decidilo todo.
- D. Combater as políticas de austeridade e a consolidación dunha democracia autoritaria. En defensa das liberdades, dereitos e servizos públicos.
- E. En Marea, un instrumento para as políticas de igualdade.
- F. Unha nova política económica, social e solidaria, para o benestar.
- G. Na defensa e desenvolvemento dos bens comúns naturais, sociais e culturais.

5. Feminización da política.

A onda de cambio político pasa non só por novos programas e novas políticas públicas que poñan no centro aos sectores subalternos. O cambio pasa tamén polo xeito en que nos organizamos para transformar a realidade. En Marea promoverá, na organización e nas institucións nas que estea representada, mecanismos que faciliten a incorporación das mulleres aos centros de decisión, impulsando a paridade, a transversalización da cuestión de xénero e o emprego de metodoloxías que faciliten a conciliación e a inclusividade.

6. En Marea na formación de alianzas para o cambio.

Consideramos as mareas municipalistas referencias e puntos de encontro, politización e mobilización para a cidadanía de todo o país. A implantación territorial de En Marea debe ser respectuosa con estas plataformas e espazos de confluencia, garantindo a súa autonomía e facilitando a súa creación naquelas localidades onde non estean conformadas aínda.

Ante o momento político histórico e como un paso máis no proceso de unidade popular e cidadá, e desde a conciencia colectiva de Galicia como nación e da cidadanía galega como suxeito político, En Marea comprométese a afondar en todos aqueles mecanismos

democráticos para a posta en marcha de procesos constituíntes desde os diferentes niveis institucionais e políticos do Estado.

Para levar a cabo estes obxectivos estratéxicos é imprescindible tecer e afortalar as alianzas cos procesos políticos do conxunto do Estado que partillan os obxectivos de soberanía popular e democrática, de recuperación das institucións para a cidadanía e de democracia económica e social, no marco dunha alianza fraterna da que son xa expresión práctica os Grupos Parlamentarios compartidos nas Cortes do Estado.

Desde o respecto á soberanía e aos ritmos de cada proceso, afondaremos na posta en común de estratexias e instrumentos para levalas a cabo.

Comprendemos que estamos nun contexto global marcado pola inxustiza intrínseca do neoliberalismo (nun marco rexido pola desigualdade, os tratados internacionais de saqueo, a crise de refuxio, a emerxencia do fascismo, o cambio climático, etc). Polo tanto non se nos pode escapar que En Marea, ademais de na escala nacional galega, deberá operar e colaborar tamén nunha muda a escala global, xerando ferramentas e mecanismos de acción política cooperativa, produtiva e comunicativa.